




女教箴規

歲在乙卯秋八月良辰

佛賜名孫慈江朝宗



吾國女教。由來尙矣。詩云。言告師氏。毛傳。師。女師也。古者女師教以婦德。婦言。婦容。婦功。儀禮。婦人有三從之義。無專制之道。故未嫁從父。既嫁從夫。夫死從子。又若胎教。婦人於懷胎時。其思想視聽言動。無不純正。則胎兒受其感化。生而聰明正直。視諸保教母教則更嚴矣。故歷代閨閫型範。史不絕書。民國肇建。雖倡女學。但以廢止讀經。禮教蕩然。近以刊行靈學內訓。陳君悟息編輯女教教規。建議與冷君方升所輯女史節要。合訂爲單行本。期可挽回女界善心。減免現在種種劫難。顏曰女教箴規。予臆其議。梓以行世。竝盼讀者集資翻印。郵送各省親友。俾全國風化丕變。女子禮教復興。抑且於家庭教育關係尤切。用誌其緣起如此云爾。

中華民國二十八年孟秋慧濟江朝宗

南無大慈大悲廣大靈感觀世音菩薩垂訓

女教教規

北京悟善女分社原本

慧濟江朝宗敬梓

教規大綱。第一孝 對父母翁姑言。第二順 對夫言。第三敬 對夫兄弟言。第四睦 對嫂姊妯娌夫姊妹言。第五愛 對兒媳前子女妾庶婢僕言。第六誠 對以上五條。皆須以誠懇由衷行之。倘有一毫僞飾討好之念。即同不守教規。故大綱五條。以誠爲實行之最要者。不言對兄弟姊妹者。女於兄弟姊妹鮮相惡也。不言對子女者。人未有不慈其子女也。若姑之於媳。後母之於前子女。嫡之於妾庶。尤易生誤會。惟愛之出於至誠。則無閒言矣。細目二十一條。五存心。五勿存心。五推心。六自治。

(甲)五存心。一 對翁姑要存對父母心。二 對妾庶要存對女兒心。三 對夫兄弟姊妹要存對兄弟姊妹心。四 對兒媳前子女要存對親子女心。五 對婢僕要存對子女心。

(乙)五勿存心 第一 勿存自私心。 註 自私與自利不同。凡利者有益者也。若爲善

得好。亦利也。人固不能一日無利。無利即非住世法矣。故住世法首重利濟。此利濟。即本於自利心。能真自利。而後能利人。如修行忠孝。即爲利於君父。今所謂自私者。大非自利比。蓋自私只是自己私意。欲便於我。而一味任己意氣。不論情理。此乃女子萬惡之首。故首戒之。此私字即氣稟。爲外物所誘之欲也。一念偶順自己私心

者即是。慎之慎之。第二 勿存暴厲心 註 暴厲者。即氣稟之最不仁者。其心乃殺害之機。爲惡而殘忍之本。此心一動。無論對君父夫兄友。皆可起厭惡不良之念。天下不忠不孝不順不和不慈。皆出於此。故切戒之。第三 勿存妬嫉心 註 妬嫉亦氣稟之欲。其心生於自私心中。而成於暴厲心。此心常恐人勝於己。人寵逾己。而遂害己之私也。故一見如此。即起惱惡暴厲心。而天下殺人致命。敗家傾國者。皆由於此。女子犯此。殆十有八九。其幸不然者。則家教好。而有賢夫賢父賢姊妹也。堯以二女試舜。而卒免此。正遇聖人耳。今世難得如堯舜之爲父爲夫者。故女子宜切戒之也。凡婦女皆宜切守此女教綱目。不可稍犯。犯則吾必罰之矣。第四 勿存陰險心。 註 陰險心者。萬惡所由藏者也。此心在君子爲少。小人爲最多。男子爲尙少。女子爲尤多。蓋君子除小人時偶有之。然終爲神罰。而亦得減量之果報。試觀史冊。累累皆是。而小人之行險陰謀。至今無一人不在地獄中。萬劫不復。受苦無邊。女子能力無多。故尤易犯此。每觀冥簿。一年中婦女犯此。致忤逆大惡。或排擠妯娌。陷害嫂娣。虐待前子女。兒媳。或傾軋取人財產。害及鄰里之女子。不下萬餘數。而每年以此被攝入冥者。每有三千人以上。甚矣陰險之害人。而教化不行。無人勸告。致陷罪戾於數劫不復之地也。今特定爲明條。使婦女咸知警戒。不敢犯爲最要。凡

口是心非。蓄意害人者皆是。即偶存陷害之心。記之不忘而不言者亦是。即有不得已事。或力所不能。亦斷勿存此心。但默訴神佛。以誠相感。必蒙佑護。轉禍爲福矣。

第五 勿存其他心。 甲 對父母翁姑勿存是非心。 註 蓋天下無不慈之父母翁姑

。惟子與女既多。其中不能無少歧疇。爲人女或爲人媳者。當以孝念爲專。孝念之外。一概屏絕。勿少腹誹。天下家庭忤婦逆女。往往由於見得父母翁姑不是處。故有忤忤之行也。近今世風尤壞。自由平等之風盛。女離其親。婦非其姑。相習成風。恬不爲怪。故列爲炯戒。 乙 對夫勿存厭惡心 註 近世自由結婚。自由離婚者衆。往往始愛之。而終惡之。或好新厭故。初見面論交者。其感情如膠漆。既已常處。或因習熟。而生厭嫌棄背之心。不知婦女應守貞節。各國頗多此習。近日吾國亦染此惡習。

。故列爲炯戒。 丙 對兄弟妯娌勿存貧富得失心 註 世俗往往於昆仲多時。其婦女即欲排斥其他弟兄妯娌。而獨霸財產。故種種陰謀惡行。皆由此貧富上之得失心所

生也。若昆仲少時。則此習尙少。惟得失心一生。即無兄弟妯娌之情誼。甚可懼也。

是爲家禍之一大因。故列爲炯戒。 丁 對妾庶勿存親疏計較心 註 世之爲嫡者。每妬其妾得夫愛寵。而疏於己也。故事事計較。因間投隙。每成乖戾。既仇於妾。復惡於夫。厥德不卒。琴瑟中乖。家庭多分析衰頹之虞。皆由此一念基之也。可不懼哉。

。故列爲炯戒。 戊 對子女勿存溺愛心 註 溺則不明。愛之適所以害之。男女皆然。而世之養成不肖者。多半由於婦人之仁。故不能不嚴爲戒飭。使知溺愛之害甚大。而不敢輕視之。以自禍其子女也。今自由之惡俗方張。凡愛子女者。稍一不慎。貽害已巨。家庭興敗攸關。故列爲炯戒。行此女教教規。由近及遠。由十及百。但在專誠實行。漸漸感化。如響斯應。其效至大。其機至捷。有非人所能計者。斷勿視爲迂濶。天下無難事。做一分是一分。化世大業。只在當下一腳踏定。一念不移。便已得其把柄矣。勉之哉。此非空話。但見親友。便拿此話去勸他。就是最大陰功。與施濟功德較更大。神不欺人。報應如響。大災大劫。皆從這裏免也。

(丙) 五推心 第一 以自己父母心推之翁姑 註 凡女子未嫁時。每外其嫂姊。而欲已父母私於己。又每視翁姑爲夫之父母。而無親切之感情。其夫久而化之。遂成不孝。能推翁姑爲自己父母。自然純孝矣。而於翁姑優遇其女兒及幼子等情。自可視爲自己在家時。亦嬌恃其父母之優遇。推之大小姑夫兄弟。而自無怨尤者矣。 第二 以愛夫心推之妾庶 註 凡夫婦皆主恩愛也。妾之愛夫而恩深者。亦如吾之愛夫而恩深也。夫之愛妾而情厚者。亦如愛吾而情厚也。人每見夫愛妾庶。或妾庶愛夫之甚。而即生妬且怒不可遏者。能推此心。則風浪全息。家庭日和矣。家庭間。此爲甚大之關

係。諸大家往往因此而敗。風俗亦有大關係也。第三 推愛子心以愛媳婦 註 凡世之虐待其子婦者。多由於以外人視之故耳。每見世之爲姑。惡嫌其子婦。不出之。則虐之。或至毒害之。家庭之大禍。半由於此生焉。須知子婦爲子之匹。亦如吾子也。吾子吾女骨肉關切。不忍少虐。則吾子婦。亦吾子所恩愛。情同一人者也。吾果不愛吾子則已。吾若愛之。則必推子之心。以及於子婦矣。能如是。則一切嫌怨之心盡泯矣。更有何禍哉。犯此者家衰。而報應亦不已。世風因之亦變壞。其子因母之非禮。輒變爲不孝。其婦亦輒因是逼爲逆婦。風俗之壞。皆因此一念不明致之也。所以垂爲大戒。第四 推夫之心以愛妾庶 註 凡有妾庶者。其主婦於夫在世。每因猜疑而生口舌。於夫去世。每因財產而致訴訟。甚至妾庶抑鬱以歿。於未來世投生爲主婦之子女。或破其財產。或夭亡。或忤逆。必使其主婦亦抑鬱以歿。如前世之妾庶然。尤甚者。出其妾婦。逐其庶子。使無生路。而不得其死者。或墮妾之胎。或害妾之子。則將來果報亦如之。獨不思妻妾同是女子身。此爲夫也妻。彼爲夫也妾。不過名分攸殊。愛夫則一。自夫視之。同爲敵體。且妾事夫育子。亦爲主婦分勞。是妻妾爲二而一。一而二也。如能推夫之心。視同一體。則家庭和睦。使夫從事職業。無內顧憂。其妻妾亦同享富裕之福也。第五 推己所惡之心。勿加之家人。 註 凡爲家人

者。與吾同其飲食起居。即與吾同其富貴貧賤也。爲主婦者。誠能以恕道行之。凡己所不欲。勿施諸家人。則一家之人。一團和氣。可以生財。可以致祥。否則好人之所惡。惡人之所好。好惡顛倒。衆怨所歸。甚至禍起蕭牆。害及全家。追原禍始。不過一念之差。遂致終身莫贖。誠能於一言一行。爲一家之人設身處地。痛癢攸關。則家人翕服。可謂其家已齊。其國焉有不治者乎。女子之教。以家庭道德爲最要。女教綱目。即本於此。五存心。五勿存心。五推心。皆重此等道德也。人之家庭。若皆修明和樂。則人才興。風俗美。國與民胥受其賜。故女教者太平之母也。惟所以能存此等心。推此等心者。以己性本善。推己及人。實行恕字。所以能勿存此等心者。則制欲懲忿。實行克治工夫也。人非上智。頓悟良知者。百不得一。而女子幼失學間。長染習俗。暗昧者居多數。故非由治標之法不可。於是不得不重克治工夫矣。且女子資淺識寡。不易使行理學條教。今特示其便利可行。而能自克治者。使每日體驗省察。則過日少。而德日進矣。

(丁) 六自治 一 治憤 婦女家庭不和。不能事親。不能和妯娌姊妹。不能睦嫡庶。不能容婢妾。皆由于憤。憤則怒。怒則嫌隙成。厲氣盛。家庭之大不祥者也。故首宜治憤。 治法 如對此人憤心生時。不念其惡。急回此憤心而念之曰。此大不祥也。

轉而思所憤怒之人平昔於我好處。及其感情。則憤心自渙然消矣。憤心消則和氣生。即少與此一人者結怨隙。家庭中即少此一禍因。而多一相愛相助之人。其利何限耶。要只在片刻轉回此心耳。注意 全重在思人好處。蓋係血誠所動。與隱忍者全異。誠能動人。雖其人惡厲。經此未有不轉者。若隱忍則根株不除。憤心仍在。不過制不外露耳。我隱忍不發。彼亦隱忍不發。懷憤在中。終必有相仇相害之一日。家庭中因此搆禍難者。不可勝計。須切戒之。依此等治法而行。自可化凶爲吉。無少憂矣。 二

治慾 治慾之事。人在世間。斷難淨盡。惟當有節。不使橫肆。且使之聽命於道心。不流入於人心爲最要。古今婦女。因此喪身辱家。亡國害民者。不可勝道。惟危惟危。戒哉戒哉。(兩惟危惟危。但指人心言也)。然稍知自愛者。所不肯出。有此過者尙不居多。惟今日邪說橫行。自由戀愛之說。幾乎公認。是何世界。與禽獸相去幾何。我同志當深惡而痛絕之。且當闢而正之。於人爲功甚大。而自已則實行節制。以治失度之慾。其法最要於慾動時。思疾病之苦痛。名譽之損失。則慾念自然冰消矣。家庭之中。有此。所不能免者。須知當理有節。謂之人道。背理與失節。謂之私慾。始而無節。久而縱肆。天理滅而人欲橫。幾何事不可爲乎。中材女子。少知自愛者。大都不肯背理。而難於有節。無節者即背理之潛端也。履霜堅冰。可不戒哉。 治法

當慾氣動時。亟行收攝之道功。使一點元陽。乘陰氣以入丹田。自無慾害。此惟有道功之女生。且有德者能之。至普通女子。以思想爲治法。法於慾氣動時。猛省此非常事。人道之失度。一身之精英。將由此竭絕。即思他人因慾患病之痛苦。或已曾患病時之痛苦。其痛不可耐。其苦無可脫。展轉牀褥。呼號無救。則此時不覺冷汗滿身。中心惕慄。若就湯鑊。又安有慾念存乎。或思平生所最失意事。心中冰冷。念灰而慾亦消矣。於戲。慾爲人生天一之源。三才之本。倘一濫用。則命門枯絕。豈獨子嗣無望。而亦負天地賦予之至寶。再或背理涉亂。則神人成怒。冥罰如響。故淫慾定爲萬惡之首。而嚴其防。古今聖賢仙佛諄諄以戒。莫不重此。良有以也。近世以戀愛自由爲新道德。以解放女權爲新政治。時流稍有聲者。輒提倡而身行之。且自率其家人行之。以大同世之盛德。望諸今日無教無學之女子。何異行薄水而馳絕崖耶。時俗之壞如此。雖有識之士夫。爲時調所厄。亦不能明非之。其害恐如洪水猛獸。害人無窮矣。故神佛不得已降乩垂訓。引爲大戒。以杜絕之。諸女生當躬行。而又當廣勸世人。使勿墮入此不測之奈河中。爲老衲等所切望者也。此條治慾。請卽宣講。但中有不宜男子講者。今無奈借老人巧舌。意到而語不露。戒寓而雅弗傷。方爲妙。哈哈。難在女子。不說明又不知。說明又難聽。唉。爲教化計。只可略小嫌而就大功。且爲同道

如家人。可以不拘矣。即請宣講。諸生皆來欽聽教規。第三 治私利 家庭中惟共助相輔。以圖一家之公益。而盡應盡之義務于家長。始爲完善。就女子道德言。必由孝誠之心。供己所得之利於父母翁姑。使其享用。己心方安。必由敬愛之心。供己所餘之資於兄弟嫂姊。使得富庶。己心始安。必由親悅其姑姨姊妹之心。分己所裕或有於姑姨姊妹。使得救助。己心始安。能如此。則一家之中。親戚之際。爲誠孝所孚感。人人相愛。彼此相助。沿習成風。男子且賴之以成孝弟。而世風將因之不變。天下將因之不爭。其端皆在吾閨闈中女子一念之萌也。可弗慎哉。常見世之大家子媳。藏其私利。瞞其翁姑嫂姊。雖貧不肯假一文。如富則爭得競取。各私其儲。彼此謀襲。或成凶訟。遂至兩敗而破其家。其始皆由吾閨闈中女子一念之差也。可弗及早以治之哉。治法 於自利之私心動時。卽思其害。一切爭訟仇軋之害。我將身受。且累及男子。則此自利心自冷然中消矣。於父母翁姑。則反求吾心之所安。於嫂姊亦然。人於己之母家。往往欲私以利與之。女子既長。於己之女家或少子。往往欲以私利與之。蓋女子之恒情也。苟如是者。無非因愛之一字耳。若於翁姑嫂姊。自推吾愛母家愛女家愛少子之心。以愛翁姑嫂姊。則私利之心自絕。而孝睦共助之事。多見於家庭中。其家興盛。己身亦被其大利。是治私利心。正所以深利己身也。鍾郝不遠。諸女

子盍不急起而推行之哉。第四 治戀 此戀字專指不當之戀愛而言。爲對時救病良藥。且採用女權。不專尙強制之舊習也。今日人權漸明。實爲胞與大同之導線。仁人聖智所夙期而未成者。惟女子經數千年家庭裁制之力。於此新潮掀播時。其反動力自必逾于男子。故今日自由結婚。獨立交際之風特盛。表面爲興女權。蓋時運所趨。不得避免。非可以專罪女子也。但實際則未嫁女子。或改醮少婦。識見淺狹。往往眩于色與才而受愚欺。不半道而反目。即終受誘騙。破產喪名者。比比皆是。皆因輕于戀愛所致。今特用省察克治之法。申爲條件。使女子自戒治焉。茲定爲自主。與主婚之父母伯叔兄長。各有一半之定婚權。凡女子于結婚時。經媒妁介紹後。父母有意。再由女子自身之觀察探驗。倘有愛慕喜戀之真情及才學。即定。而仍由父母等主之。否則認爲無感情時。女子亦得拒婚。或女子對於其所遇者。發生一時不甚詳確之戀愛。而執其一己之謬見。或被惑時。自謂可以託終身。有非此人不可者。必須經女子之父母兄長等詳爲探驗。倘可固佳。否則認其人爲僞。或其才學性情不足爲偶。父母兄長等亦得以理喻其女子而拒婚焉。或遲其期以觀其人之結果。爲女子者。正當詳審其所愛戀之人。好尙習慣。視其奢儉厚薄常變。則立知之。知之而得雙方同意。然後稟命於父母等主婚人。以禮爲合法之正式結婚。終身不貳焉。此法行。自無始合終離之弊

害。因離婚皆最初擇婚不慎所致也。父母強制之俗。固時有此害。而尤以自由結婚者之蹈此失轍爲最多。蓋少年無定識深慮。輕合則輕離。一定之理勢也。求自由反不自由。求戀愛反致乖戾。皆由其始一念之不慎也。治法 女子於熱度高。戀愛發時。當思吾此身何等貴重。一失足。終身莫贖。恨無可追。身體名譽之利害。皆在此一念。吾豈可因此一時一念微杳之戀愛。犧牲終身如此之巨耶。思至此。則戀愛之念自淡。自必求商于父母家人矣。此條似治慾而實大異。蓋治慾爲絕對的。治戀爲相對的。因今女權漸明。風氣所趨。實不能遏之使絕。而男女相悅。又爲天地氣機之使然。如倫常之不能廢也。既不能廢。惟有因其勢以利導之。順其情以疏濬之。自然端造倫正。而害遠矣。是亦提倡自由女權之一方便法門也。此篇多爲演講。于新女界有莫大功德。切切。第五 治褊 女子稟性柔狹。非陽華發揚之氣。所以拘鬱之情。自十五歲以後。便基於心腦中。爲處子時。不爲傷春之感。便成懷秋之嘆。其所向者。恒爲一隅之動機。久之每成勞瘵。與蟲症。或思想界精神之病。此爲處子者之褊所當治也。至爲人婦時。每先存其成見。以爲男家非我家人。皆協而謀我。於是翁姑妯娌夫兄弟姊妹及婢僕等。對新婦之一言一笑。原無歧視之心。而新婦每生猜疑之念者。十有七八。或泣訴其夫。爲欺侮之言語。或對家人所問非所答。爲誤會之由來。若遇其夫

明理達情。一語解紛。新婦之疑念頓釋。卽一家之和氣愈固。否則其夫僅聽一面之辭。不加剖白。亦怨家人之異視。而新婦之疑心益甚。日積月累。弱者則鬱而爲病。強者則憤而成悍。皆由此褊心而起。其夫從此多事。內顧增憂。此爲人婦者之褊所當治也。治法 富貴家之處女。須令多讀聖賢書傳。古今歷史。則胸懷自然濶大。而無狹小之見。不可讀紅樓夢桃花扇西廂等書。以引起癡滯之褊心。若貧賤及中等家處女。當令其勤於紡織鍼黹。則人勤於事而思欲寡矣。此時若再容其懶惰。或驕傲。則人逸而思欲失於褊者比比矣。此治處女褊心之要法也。至婦人之治褊法。第一當思吾夫爲百年偕老之伴侶。夫家爲終身之家。與母家僅爲生長之地者不同。一久一暫。判若霄壤。則去其戀戀母家之心。而於夫家自生親睦之觀念。第二當思吾子將來成年。亦娶人女爲婦。吾爲其姑。家事亦付兒媳管理。祇有愛護之不遑。豈有欺侮之思想。再推諸一家諸人。設身處地。視同一體。自轉猜疑爲親信。第三當思吾夫終日奔走。無論爲士農工商。或達官小吏。已疲精勞神於職業。其心中所盼望者。得承父母之歡。享妻子之樂。爲其精神之休養。以圖職業之發展。若入其閨閣。所聞皆詬誶之聲。所見皆憤怒之色。勢必不安於室。與游手好閑之朋友。娛樂於花街柳巷。徵逐於戲館影場。則吾夫妻之愛情日淡。即吾夫妻之苦境日增。勢必貽譏於鄉黨。以上三者。皆婦

人當然之理想。何去何從。顯而易見。況心褊者爲量寬之反面。卽福薄之現象。俗諺每謂某婦人福氣甚好。度量甚大。而不知人人皆可自求多福。自宏厥量。反謂他人命好。自己福薄。然則如何求法。不過去其褊小之心。變爲寬大之量。卽享大福。作好命人矣。此治婦人褊心之要法也。 第六 治唆 女子於世有三從四德者爲少數。況今日耶。今日社交公開。女子且爲講師爲演說家。平居在學校。則醉心自由。品人論物。月且風刺。無所忌焉。在家室則終日嬉戲。或多遊蹤不定。西園芳草。東陌香車。此中李家之姬。或議張氏之姑。趙門之婦。反笑王家之女。揆厥由來。無非言語挑唆而起。若使長此不防。旣無正義以持其心。益多莠言以亂其性。一家之家禍。反起於家外之女言。此唆之益不可不治者一也。吾國之俗。姑婦姊妹娣多同居。同居之間。愛憎予奪長短是非生焉。此一女也。欲問其嫂或娣。彼一婦也。欲唆其妯或娣。或母愛有偏。或姑聽不明。於是交相爭。而交相惡。家不得興。人不得安。重以正義久不明於天下。一家勃谿。諸家染之。習以成風。天下乃益大亂而不可止矣。揆厥由來。唆爲之耳。此唆之益不可不治者二也。鄰里比椽。習染最易。甲家之事每聞於乙。乙家之事亦每聞於甲。甲或不以乙爲然而恨之。乙或不滿意於甲而議之。男相見而女相遇也。甲乙之相居益久。則兩家之間言。互起是非。甲唆乙。與乙之人相爭。乙

唆甲。與甲之人相爭。忽而又來丙焉。來丁焉。苟非正人。則其間之爭唆。亦猶是甲與乙也。而且更煩之矣。凡唆之起。莫不由於女子。男子不能也。是故孟母擇鄰。而班氏戒多言。此唆之益不可不治者三也。治法 對於上言第一種之唆。治之之法。爲家長者當先嚴禁三姑六婆。(三姑者。尼姑。道姑。卦姑。六婆者。牙婆。媒婆。師婆。巫女。藥婆。虔婆以甘言悅人者。穩婆收生。)不許其與家人接近。次則諄囑家人於親戚朋友間。除喜慶喪葬問安視疾外。無事應少往來。復次則家中婦女。除有專門學問。依其所學。出而治事外。其餘均應料理家事。撫育子女。不得出入公共場所。嬉遊過日。對於上言第二種之唆。治之之法。爲家長者應於每晚飯後。或每星期定一二次。與家人聚談本篇女教教規之綱目。並說明人類同受天地之中以生。原無種族同異之區分。更無家族親疏之區別。應有博愛之德。不可有偏聽或偏愛之心。自泯其愛憎予奪長短是非之成見。是家無不可齊。而國無不可治。天下無不可平矣。否則家家不和。即舉國不和。亦即天下不和。而國際戰爭以起。使人類之父母兄弟妻子。離散於四方。生死莫卜。痛苦何如。對於上言第三種之唆。治之之法。吾國俗諺。有打掃自家門前雪。休管他人瓦上霜。是卽爲治唆之格言。爲家長者如能擇鄰而處。上也。戒勿議論他人家事。次也。若任其家人唆成禍起。牽連比鄰。涉訟法庭。始悔向之多言或妄言。致

構成教唆罪。已無及矣。（按刑法規定。教唆他人。使之實施犯罪之行爲者。爲教唆犯。教唆教唆犯者亦同。教唆犯處以正犯之刑。）爲家長者切戒家人慎言爲要。所有教規綱目。仰即編輯再加序注發刊。此等教規。行一分。便有一分效。即化一人一家之凶厲爲吉祥。故出一篇。即刊一篇。各賜一紙。此後講演列女傳等。亦講演教規。藉以化現在女子也。

讀法 婦女於每日晨。將教規綱目。自誦一遍。然後行事說話。須視與教規有違背否。有則速自悔改。遇有憤怒。或思戀時。即速將教規治憤治戀各條細看。及夜就寢以前。再誦一遍。凡是日有違背者若干事。記於日記本。不記其事。僅記其數。使有敬畏檢束。如此。則熟於道義。道氣日增。頂上紅光蠶起。何魔敢近。百病不生。惟恐人不能實行耳。

講法 凡家人暇時聚談。或戚黨往來聚會。或有吉慶。親友咸集。皆可以此教規相勸化。並囑互相宣傳。俾女子風俗。爲之轉移。則男子自化。此治平之本也。

印送集資法 本篇教規字數不多。印一千本。不過數十元。加印可省印費三分之一。至集資方法。或由婦女節省脂粉娛樂之資。或由父兄給予印刷之費。或聯合女界同志捐款。集腋成裘。或由家長約集親友。出資合印。種種方法。不勝枚舉。

。有志竟成。無論男女。但有斯願。天必佑之。使其成功。此則編者所屢試屢驗者也。

靈驗 觀世音菩薩 屢顯種種靈感。世所共知。癸亥年五月初一日奉 觀世音菩薩示。有能以此女教教規。自行而不背者。月記大功十次。免一身災。有能以此勸一人者。免其家一人災。有能多勸。以至移轉風氣者。除免全家全族災外。本身富貴壽考。十年內立予報應。決無虛言等諭。 佛不誑語。當此大劫臨頭。水旱炮火瘟疫諸災。遍地皆是。欲挽斯劫。端賴衆善。不但女界須遵教規。男界尤當悔過從善。常誦太上感應篇等書。念善。語善。行善。三善俱備。萬祥畢至。任何災劫。自可避免矣。

編者 悟息 陳承烈 恭紀

女史分類節要

吳序 易曰女正位乎內男正位乎外男女正天地之大義也國民中女子居部分之半其有知識有程度具國民之資格者固不乏人至於耳目壅塞毫無能力爲頑民爲懦民爲廢者亦所在皆有以國家主義言之關係豈淺鮮哉 政府注意教育所期望於前途者何限冷君子貞著女史節要一書其綱要根據禮經其事實徵諸歷史分類采輯宗旨尙純可供家庭教育之用亦女子知識程度之階梯即國民資格之津筏也爰爲之付印以公諸同志焉 吳佩孚序

史 節 要

冷序 唐虞大聖嘗以帝女觀型孔孟少孤均賴慈幃訓迪二南首關睢見周得太姒以興也列國首栢舟見衛失莊姜而亂也禮曰婦順備而後內和禮內和禮而後家可長久也由是觀之一國之安危治亂一家之成敗興衰婦女皆有責焉我中國禮教相傳數千年來閨型閭範輝流形管載在簡編近十餘年間當道偉人提倡女學豈徒慕歐洲之文化仿外國之開通哉誠以今日之女子將來爲人婦則有內助之責爲人母則有教育之責承先啟後關係匪輕爰就禮經三從四德之義舉古之可法可傳者分類采擇輯綴此篇名曰女史節要用四言韻語以便誦習第一孝愛在家從父兄也第二淑婦嫁則從夫也第三節烈從一而終也第四賢母夫死從子也以上四者謂之三從第五慈仁第六信義婦德也第七文學第八武略第九識鑑婦言婦容也第十職業婦功也以上六者謂之四德此十者人道之所先女學之要素也經濟道德胥備於是他

女

日徽音相嗣福履綏成由家而國則富強可期矣然而坤道其順承天所以時行公本無私周母安能制禮王司徒之四畏劉孝標之三同貽笑於人前車可鑑平等自由之說殆無取焉是爲序
中華民國七年歲次戊午舊歷小陽月叙於衡陽防次 滇南冷方升

●●目錄●第一孝愛 女嫫 瘤女 北宮女 女涓 緹縈 楊香 叔先雄 崔女 詹

女 瑩餅 曹女 陳女 崇禎公主 附曹娥 陳女 趙女 李女 葉女 馮女●第二

淑婦 姜后 齊妃 齊婦 郤妻 桓少君 王章妻 孟光 姜詩妻 呂榮 陳詵妻

寶后 崔樞妻 唐氏 元稹妻 意辛 張夫人 附唐公主 沈束妻●第三節烈 共姜

孔夫人 楚貞姬 韓憑妻 梁高行 貞義 張禮休 范姬 羅靜 盧氏二女 寶氏

二女 高妹妹 包公子婦 儲范氏 王氏 金氏 劉夫人 費宮人 附劉桓氏 登妻

段紀配 羅氏 李朱氏●第四賢母 敬姜 孟母 趙母 陳母 王陵母 翟母 徐

庶母 陶侃母 王僧孺母 顏魯公母 李景讓母 穆姜 柳母 歐母 寇母 程子母

陳祐母 附陳堯咨母●第五慈仁 樊姬 孫叔敖母 漂母 嚴母 雋母 孟宗母

長孫皇后 宣仁太后 張顯女 元世祖后 明馬后 徐后 林媼 林姑●第六信義

許穆夫人 介子推母 趙姬 老萊子妻 班婕妤 辛憲英 姚楊氏 孔氏 梁公姨母

孫姑 劉竇妻 姚廣孝姊 胡廣女 鄭曉妻 附北郭妻 曹女 蔡君山妻 李白孫

史

節

要

女二人●第七文學 柳下惠妻 伏女 班昭 蔡琰 甄后 衛夫人 謝道韞 王肅女

徐惠妃 王蘊秀 李紳母 關圖妹 楚材母 吳叔仁妻 沈瓊蓮 楊太夫人 蔡琬

高景芳 李女 附崔師氏 鮑昭妹 崔寔母 白香山女 邢母●第八武略 邑姜

馮夫人 孫翊妻 孫夫人 任城王母 趙娥 李秀 朱序母 邵女 荀女 木蘭 太

宗妹 桂娘 奚氏 李侃妻 王女 張夫人 秦良玉 竇夫人 附衛州 侯氏 滑州

唐氏 青州王氏 崔寤妾 楊潘氏 李羅氏●第九識鑑 鄧曼 衛姬 僖負羈妻 柏

谷婦 李衡妻 山濤妻 石崇婢 桓元妻 王珪母 侯敏妻 劉晏女 苗夫人 附何

無忌母 韓康伯母 上蔡媼 草澤媼 元世祖后●第十職業 黃帝妃 周太姒 陳仲

子妻 陸績母 薛靈芸 蘇蕙 李絡秀 翟氏 劉元佐母 齊母 薛濤 周行逢妻

趙子昂妻 雷膺母 朱家民妻

●第一曰孝愛●嫂象害舜。女嫫周旋。私更醜酒。骨肉保全。舜父瞽瞍愛後妻所生之子象象性傲腹與之謀殺舜使舜完廩卽焚廩使舜穿井即捨井舜皆不死又以醜酒害舜舜妹女嫫私更易之舜得保全●齊有瘡女。車從過前。采桑不顧。守命惟堅。齊有女貌端整而頰下有瘤出而采桑齊王車駕經過衆皆往觀女獨采桑不顧王問之對曰奉父母命采桑未奉命觀大王也王奇其言欲載以歸女不可王以禮聘之至服飾如常王命之飾對曰妾

聞堯舜不飾天下歸善桀紂飾天下歸惡王悅立爲夫人●北宮氏女。環瑱是捐。庭幃眷戀。心不遑安。齊北宮氏年老無子有一女極孝撤其環瑱卻拒媒聘不忍嫁也●津吏醉臥。有女名涓。操舟攘袂。解免父愆。趙簡子欲伐楚津吏醉臥不能操舟簡子怒將殺之。其女名涓懼而請曰妾父聞君將東渡不測之淵禱於九江三淮之神不勝巫祝杯盤餘瀝以至於醉願以微軀代父乃攘袂操舟爲河上之歌以鼓勵衆工簡子歸納爲夫人●緄縈救父。詞意纏綿。文帝惻憫。肉刑除焉。漢淳于意有罪將刑其女緄縈上書曰妾父爲令齊人皆稱廉平今有罪當刑夫刑者不可復續妾願入爲官婢以贖父刑俾得自新文帝憫之免其父並除肉刑●楊香搃虎。父脫於前。手無寸鐵。試以空拳。楊豐爲虎所噬其女名香年方十四手無寸鐵直搃虎頭虎釋豐而去●叔先雄者。殉父江邊。芳名不朽。碑石巍然。雖爲人叔先泥和爲縣功曹縣長使之詣巴郡太守舟覆溺死其女名雄求父尸不得自沉於父死之處越數日與父屍俱浮水面守令收葬爲立碑。又曹娥上虞人其父迎神死於水娥十四歲殉之數日與父尸浮見於一處人爲之立碑。又梁時博羅陳志無子有女至孝不嫁志年八十卒女營葬畢以宅爲寺廣州刺史蕭譽表孝女祠。又山陽趙氏女截耳誓不嫁以事其父。又汴梁李氏女事母不嫁。又歙縣葉氏女親早逝叔父母撫養之頗厚叔母病女割股食之終身不嫁。又馮氏女母病割股療之母卒廬墓以終●吉懋崔敬。強結婚姻。崔氏小女。代

姊而行。吉懋爲其子瑱求婚於崔敬崔本不悅然畏勢不敢辭及親迎女堅臥不起敬甚焦灼其小女曰救父之急卽爲婢亦不可辭乃代姊而行後來吉瑱爲首相●宋紹興時。蕪湖被兵。詹氏之女。贖其父兄。宋紹興時有賊號一窩蜂陷蕪湖詹氏父子被執有女年十七歲哭拜曰願相從贖我父兄賊許而釋之掠女行至東市橋女投水死●秦檜搆獄。武穆含冤。瑩餅慘痛。殉父九泉。高宗時岳王屢敗金人奸相秦檜主和議假金牌詔岳王班師誣以擁兵抗命除夕制死於獄王有女名瑩餅投井以殉今湯陰縣岳王廟祀瑩餅像於側室有聯云虎女甘隨親入地蛾眉不與賊同天●曹母有女。形影孤單。遭逢變亂。閭里安全。元錢塘曹氏母無子女留身以養母歿女年已五十至正間遭亂女閉門而死賊收葬之不犯其里相戒曰此孝女莊也●陳穗夫婦。殞命青年。女撫二弟。啟後光前。明福建沙縣陳穗夫婦相繼病歿二子年未十齡一女稍長族人利其貲富欲嫁之女泣不嫁而遇族人之恩禮衆遂安之女教撫二弟一成進士一登鄉薦或勸女曰二弟成立汝志畢矣女必有家古之道也乃嫁一士人年已四十矣無生育二弟迎歸事之如母●崇禎公主。遭遇時艱。清廷恩渥。涕泗漣漣。燕京陷之前一日莊烈帝悲憤已極手刃長公主曰汝何故生我家清軍入關收養於宮中視如所生訪獲原定駙馬周親王之子賜田莊以公主禮嫁之公主感懷故國日夜悲泣嫁未逾年卒以哀毀而歿

●●第二曰淑婦●宣王晏起。姜后脫簪。永巷請罪。王政以勤。周宣王晚年怠於政事。姜后脫簪於永巷。以諫曰。百官咸至而王未起。人將謂王以姜之故也。請治姜之罪。王於是乎早起視朝。●齊妃戒旦。夜寐夙興。心常恐晚。詩賦雞鳴。詩齊國風云。雞既鳴矣。朝既盈矣。又云。會且歸矣。無庶予子憎。集傳云。賢妃當夙興之時。心常恐晚。非其心存敬畏而不留於逸欲。何以能此。蓋衛共姬之言也。●賢婦相警。起視雞鳴。琴瑟靜好。贈報同心。齊詩云。女曰雞鳴。士曰昧且。子興是夜。明星有爛。又云。琴瑟在御。莫不靜好。先賢所謂燕私不形於動靜。情慾無介於儀容也。末章曰。知子之來之。雜佩以贈之。知子之好之。雜佩以報之。則賓客往來。從夫所向。無異趣。無慳吝。其賢可知也。●郤妻饋田。相敬如賓。賈季過之。薦於晉庭。春秋傳。賈季過冀。見郤缺。耨其妻。饋之。敬相待。如賓。載之歸。言於晉侯。以爲大夫。●鮑宣娶桓。名曰少君。鹿車共挽。裙布釵荆。漢鮑宣娶其師桓。譚之女。字少君。入門。服飾甚盛。宣曰。此非所望於卿也。少君乃改着布裙。與宣共挽鹿車。其後鮑宣官至司隸。●王章落魄。牛衣涕零。妻有遠識。知足爲榮。王章家貧。冬無被。臥牛衣中。泣涕。妻曰。京華冠蓋相望。皆有志者。爲之泣。何爲也。章力學。官至司隸。校尉。欲上封事。妻曰。人貴知足。汝忘牛衣泣涕時耶。章不聽。果獲罪。下獄。獄卒傳食。數日忽少。一人章女。方十歲。聞之。泣曰。吾父性剛。必死也。果然。●梁鴻孟光。齊眉舉棧。偕老百年。勤作自贍。梁鴻字伯鸞。妻孟光。貌醜而多力。嘗曰。吾欲得志。

行如伯鸞者乃嫁鴻感其言遂娶之孟氏家富光服飾頗饒鴻曰吾欲得裘褐之人與之偕隱耳光笑曰將以觀子之志也乃椎髻着布共隱於灞陵山中嘗賃舂於皋伯通之廡下光進食每舉椀必齊眉百年偕老人以爲賢●姜詩之妻。恪供母膳。鯉躍泉甘。孝德所感。姜詩之母喜食江水活魚妻偶缺供母怒命詩出之妻潛作膾託鄰婦以饋母母感悟命詩召回忽舍旁有清泉湧出時見雙鯉遊躍因取以供母人以爲孝德所感●呂榮勸夫。垂涕致詞。其夫感悟。立名於時。吳許升之妻呂榮善治家動作以養其母升飲博放蕩榮每泣涕婉勸升不聽榮父召榮歸欲改嫁之榮曰命之所遭豈可離貳而事升益誠謹升感悟就學致名譽本州辟舉行至壽春爲盜所殺刺史尹曜捕獲盜榮手殺之以盜首祭其夫。●陳詵之婦。篤於孝思。姑陷於賊。往救不辭。陳詵之妻李繁之姊也詵之母爲賊所執李氏詣賊請曰妾之夫陳詵自失其母日夜哀號故遣妾來請釋妾姑以妾供浣滌縫紉之役賊釋其姑而留之見其衰毀不忍犯久亦釋之詵娶嚴氏矣李繁尋獲其姊送於詵夫婦再合如初王愆期議曰鄙野之人詣賊請姑可謂孝矣見禮志●唐高祖母。素少霽顏。竇后敬謹。獨得其歡。唐高祖之母母性嚴厲晚年羸疾諸娣妣事之多不得其歡心惟竇后和怡敬謹太后對之終日笑語自若又王珪之子敬直尙太宗公主主以新婦禮謁見翁姑以後遂爲常例●崔樞之婦。整肅端嚴。時粧禁用。家法可傳。崔樞世爲宦族夫人治家有法凡男女貴賤皆不許用時粧●

唐氏乳姑。姑曰孝哉。待爾子婦。報爾將來。崔澹之曾祖母長孫氏年老齒凋其祖母唐氏乳之不倦賴以康健者數年及將終謂唐氏曰賢婦之德我無以報願後世得婦如汝報汝於將來可也崔氏簪纓之盛及孝弟家法冠於唐時●元稹伉儷。篤好無猜。置衣搜篋。沽酒拔釵。元稹微時夫婦情篤及宦仕其妻已沒元稹悼亡詩云野蔬充膳甘藜藿落葉添薪仰古槐又云顧我無衣搜燼篋促他沽酒拔金釵●意辛守正。識過羣姬。不爲魔魅。禮法自持。遼史耶律奴之妻蕭氏字意辛諸娣妒爭以魔魅取寵意辛曰何如禮法脩己以潔奉長以敬事夫以柔御下以寬自然見重於君子且魔魅無論其無益問心能不愧乎●椒山被陷。夫人含悲。請以身代。忠義並垂。明嘉靖時奸相嚴嵩與其子世蕃弄權納賄無惡不作楊忠愍公繼盛劾其五逆十罪嵩搆於帝帝先生被廷杖下獄三年世宗無必殺之意也時大學士張經亦被搆陷嵩黨嗾嵩將先生名附奏遂同處決夫人張氏上書曰妾夫楊某錯聽市井之言不改書生之見得罪當途已與張經並讞處決伏維聖德好生昆虫草木尙蒙育覆妾夫楊某卽罪在不赦請將妾梟首於市以代夫死妾夫得發烟瘴充軍當遠禦魍魅銜結以報嵩抑不以聞先生遂遇害先生爲忠臣夫人爲義婦及嵩敗世蕃被誅乃追贈公官其二子 又沈束爲京官獲罪在獄其父年近八十妻張氏請代夫囚俾得歸養束旋得釋

●●第三曰節烈●衛世子卒。其妻共姜。柏舟自矢。志擬冰霜。衛世子共伯蚤死其

妻共姜守義父母欲奪而嫁之故共姜作柏舟之詩以自誓●孔父媾難。華督無良。夫人全節。後裔發祥。宋華督見司馬孔父之妻目逆而送之曰美而艷遂弑宋殤公殺孔父而奪其妻孔父之妻縊於車中其後裔避難遷於魯傳六世而生孔聖●楚有貞姬。不貳其行。嘉名璧錫。千載流芳。楚白公勝死其妻紡績不嫁吳王聞其美使大夫以黃金白璧聘之以輜駟三十乘往迎姬辭焉吳王以爲賢不敢強諷曰貞姬●韓憑之婦。不樂宋王。塚前烏鵲。猶戀鴛鴦。戰國時韓憑爲宋王舍人王悅其妻何氏築青陵台以要之遂捕舍人何氏作烏鵲之歌其詞曰南山有烏北山張羅烏自高飛羅當奈何又曰烏鵲雙飛不樂鳳凰妾是庶人不樂宋王且請以尸還韓遂投於臺下而死王怒殺舍人故離之不使與妻合葬未幾有烏鵲飛鳴於二墓之樹往來如鴛鴦狀王旋病其寵姬曰王如不諱妾願侍左右於泉下無效舍人夫婦徒化烏鵲也王死遂以殉●割鼻全節。事始於梁。王高其行。爲之表章。梁有賢婦早寡不嫁梁貴人求之不能得梁王使其相聘之婦人割鼻以誓梁王高其行諡曰高行●樂羊之婦。孝敬姑嫜。鄰人劫之。自刎而亡。漢樂羊子河南人遊學拾遺金而歸妻以爲汙乃舍之復出就學妻事姑極孝鄰人執其姑以劫之妻自刎太守正鄰人之罪以大夫之禮葬之諡曰貞義●張氏禮修。塗碧改容。手持利刃。賊避其鋒。趙高妻張氏字禮修姑嚴酷禮修孝謹姑感悟臨終氣絕於禮修之懷謂其女不如禮修之孝也後郡內遭亂高死君難禮修塗

碧改容手握利刃賊不敢犯叔父矜其年少欲更嫁之禮修以死自誓◎范姬截耳。以表其衷。迎者空返。大節克終。范慎女名姬適孫奇十九歲而寡無子慎使人迎之姬不肯歸使者以父命迫之姬以刀割耳曰父趣我歸以我年少而色美也今已殘矣行將焉往使者空返◎丹陽羅靜。少逢鞠凶。感壻之德。誓死相從。丹陽羅勤之女名靜許字同里朱曠未嫁而勤死靜祇一妹未滿十齡內外無宗戚曠乃觸冒爲之經營喪葬事畢曠亦病尋死靜有殊色感曠之德誓死不嫁楊祚親往納幣靜逃逸祚執其妹靜乃出見曰妾感朱曠實爲妾父而死是以託身亡者辛苦之人若不蒙矜全請畢命於今日妹孤幼勿驚害也祚乃止又劉長卿沛郡人妻桓氏生一子名玉方五歲而長卿死玉十五歲亦死桓氏引刀割耳以明不貳宗婦憫而問之對曰先君五更尊爲帝師男以忠孝女以貞順故預刑以明吾志沛相奏旌其門曰行義桓嬖又隄爲相登妻名度適登一年而寡守令吳厚因入問度度引刀截髮縣長史復遣媒介至度曰前已表此心何復有斯言哉欲引刀割鼻左右救止長史乃已又蜀景奇妻羅氏字貢羅奇亡無子其父青以許鄰人宰詩女作書寄父歷年不歸詩告於州強遣之女誓死不從州嘉其志遂不遣又廣漢廖伯妻段氏名紀配達於詩書進退嫻雅伯亡父母將有所許紀配曰梁高行割鼻全節豈可使專美於前作詩三章以刀截指◎盧氏二女。貌似芙蓉。恥作賊婦。烈烈轟轟。晉杜弼反陷長沙掠前始興太守盧氏二女皆國色也欲以爲妻使老嫗勸慰之曰杜

官人丰采出衆非女公子不足配也女曰人豈在貌彼有丰采而無心肝乃反賊耳何謂官人我姊妹二千石女豈爲賊作婦皆自殺●寶氏二女。墜於岩峰。一生一死。猩血常紅。唐時寶氏二女爲賊所掠行至途中乘賊不備自投於懸岩其一登時氣絕其一不死賊退而歸所觸之石鮮血常紅歷久不變人刻其石曰寶烈女殉節處●高女妹妹。七歲孩童。耻爲賊婢。名達九重。高納拒命劫質高彥昭家屬使守濮陽建中二年彥昭挈城歸河南統制劉元佐納屠其家彥昭女名妹妹方七歲母憐其幼請留爲婢賊許之不肯母兄皆拜四方就戮女曰吾家以忠義被誅神尚何知向父所在再拜而死德宗聞之泣嘆不已詔諡曰愍●包公子婦。敬奉高堂。擇人承繼。以祀循良。宋包文公公子名纘早卒無子纘妻守志奉事翁姑其父母欲召而嫁之女不歸擇宗人之子以承禋祀●儲妻范氏。孝格彼蒼。澗生蘆草。神物幽芳。明永樂初儲福無錫人發充雲南曲靖衛卒福日夜泣守義而死妻范氏事姑韓氏極孝每哭必於山谷不欲使姑聞也忽一日見澗邊有草因取而織蓆以供姑膳姑年八十而終范氏七十八而終以後草不復生●慈谿王氏。艱苦備嘗。卒成其志。門閭增光。慈谿王氏夫死無子姑欲嫁之姑有女助姑爲虐處以小樓久成足疾及姑之女既嫁姑感其孝乃和好無異擇族人子撫養之子長成登鄉薦筮仕門閭遂光大焉●金氏撫妾。教子義方。章綸登第。官至侍郎。樂清縣章文寶聘金氏未娶納妾包氏有妊文寶病危金氏堅請往視一

見而文寶卒金氏撫妾守喪妾生子名綸金氏視同己出親教以書綸登第官禮部郎中及英宗爲土木額森所虜弟景帝代之廢英宗太子見深而立其子見濟綸欲諫恐得禍貽母憂金氏曰汝能如是吾復何恨諫果下獄景帝封巨梃杖綸與况鍾鍾死綸甦及英宗復辟釋綸官至禮部侍郎●劉夫人者。夫在咸陽。送兒還父。有女殉娘。崇禎末劉夫人率一幼子及二女在京夫爲隴西邊將戒嚴時夫人遣健僕負幼子拌作乞丐送至咸陽與其父城陷時劉夫人率二女共縊其絕命詩云凶莫凶兮國喪亡內廷無救各奔忙心憐夫嗣兒還父義慘君仇女傍娘日前送別出陽關立石望夫還未還音信憑誰隴外寄安知汝婦已投繯●宮人費氏。胸有主張。殺賊自刎。其喜洋洋。燕京陷時宮人費氏年十七投水不死羣賊挽出共爭之費氏給之曰我長公主也非李王不事賊肅然獻於自成自成問諸降者云非是遂以賞其將羅校校大喜費復給曰我實天潢得事將軍於願亦足然非擇吉成禮祭告我父皇雖死不從校許之召其黨飲費氏盛服出而勸酒賊黨盡歡而散校醉入房費氏僞爲解衣因以利刃刺校胸立斃乃出房門自刎衣帶中有一帖云我一幼女子陷賊手數日不辱其身且得殺一強賊含笑入地矣惟恨諸降奴誤我事使李昽不留我也自成聞之大駭命厚葬之禁其黨勿搜掠婦女又前清同治初年雲南回夷倡亂宣威人民李應雄戰死其妻朱氏爲賊所執負一女孩乘賊不備自高峰墜死砰然有聲聞於數里

●●第四曰賢母●敬姜訓績。教子以勤。夕思朝考。先業祇承。公父文伯爲季氏宰其母績文伯日以馱之家而主猶績恐季孫怒也母曰沃土之民淫佚也瘠土之民向義勞也今我寡也爾在下位朝考夕思日夜處事猶懼墮先人之業況敢怠惰乎●孟子之母。斷機擇鄰。戲言必踐。教以信誠。孟子少孤母教撫之一日孟子廢學母斷所織之機以警之嘗三遷擇鄰得學宮之旁乃居焉一日見人宰猪孟子問之母戲言曰將以食汝旣而悔曰是教之誑也卒買肉以食之●趙奢之子。素喜談兵。母知必敗。力止其行。趙奢爲大將其子括讀父書喜談兵母戒之不聽趙王欲用爲將以當秦母曰此子不可用也其父每遇戰事日夜以思憂形於色今此子以兵事爲甚易若必用之他日不勝其任妾請無坐趙王竟用之遇白起大戰於長平降卒四十萬被坑母因言之於先得而坐●陳嬰舉事。母懼弗勝。嬰不率教。敗北而奔。秦二世無道陳涉吳廣揭竿而起東陽人奉陳嬰舉事嬰母曰汝家世寒微驟富貴不祥不如有所屬成則少分其利嬰不聽果敗●陵母在楚。知漢必興。向風刎頸。陵遂進征。漢高祖起兵王陵以兵屬之時楚漢相持楚項籍劫執陵母漢使者至陵母寄語陵曰漢王長者汝善事之母以我爲念也遂自刎以絕陵望陵乃進兵●方進幼時。入都受經。後母偕往。撫育殷勤。漢書翟方進爲小吏蔡父相之謂其有封侯骨乃西至京師授經後母憐之與之入長安織履以供其費方進射策甲科後果封侯●徐庶之母。陷於曹營。操給庶至

。母遂捐生。三國徐庶字元直從劉先主曹操留其母厚遇之僞爲母書以召庶庶至母責之曰吾以爲汝學有進矣劉皇叔帝室之胄寬厚仁明汝得其主而離之遠來何真僞之不辨也入而縊庶遂隱●侃母却饋。履潔懷清。豈惟剪髮。以延嘉賓。晉陶侃嘗爲縣吏穿魚池以魚鮓寄其母湛氏母封還遺書曰汝以官物寄我匪惟不能益我且反使我憂也又侃素貧母嘗剪髮以延賓並於雪夜親到草薦以餉客馬爲侃致名譽然母之賢不在此也●僧孺貴顯。克慰母心。中丞鹵簿。對之涕零。梁書王僧孺幼貧其母織布營生撫僧孺就學一日率僧孺入市適中丞鹵簿經過驅迫之母子墮入溝中及僧孺爲中丞鹵簿在前感憶當日輒悲不自勝每出恒車簡從禁止呵叱●魯公博學。書法尤精。忠貞大節。肇自家庭。唐書顏真卿字清臣師古五世從孫也少孤母蔣氏躬加訓導教以博學及書文行義長爲平原太守安祿山之亂與從兄杲卿起兵勤王威名大振後死於李希烈之難封魯國公書法精粹獨成一家爲世所寶●景讓在鎮。誤於用刑。賴有賢母。衆憤乃平。李景讓之母鄭氏性嚴厲知書文親教其子嘗因墻覆錢盈船母曰天若祐李氏願諸子學問有成錢不敢取仍命覆之景讓年頽白膺節鉞有過猶時加撻楚爲浙西觀察使誤杖斃一牙將軍中皆憤太夫人出叱景讓伏地曰天子寄汝以方面之重汝不先用德教而輕用刑威萬一一夫不甯汝負國恩且使老身何面目見先大夫於地下乎褫衣將杖衆邀免乃已軍中悅服●穆姜前子。視同所生。德

感而化。請罪法廷。程文矩之妻穆姜生有二男待前妻所生四子衣食皆厚於所生而前

四子不孝或勸之分居穆姜曰吾以德感久當自化及前長子興病困幾死穆姜調藥餌不倦久乃瘳泣謂三弟曰微母則吾不起矣母賢如此而我輩不孝何以立於天地之間乃相率詣南鄭

獄陳母德請罪縣令釋之而請表其母見白帖●柳母和丸。茹以苦辛。諸子奮勉。世繼簪

纓。柳仲郢之母韓氏和苦參熊膽爲丸使諸子含之以警其倦怠諸子皆成名極一時簪纓

之盛●歐母畫荻。教以書文。文忠登第。爲宋名臣。宋歐陽修幼時母嘗以荻管畫地

爲書文以教之修登第入翰林爲宋名臣諡文忠●寇公年少。鷹犬是耽。創痕具在。撫輒

沾襟。寇萊公名準幼時放蕩不馴嗜鷹犬太夫人怒以杵錘擊之足流血成痕痕公爲參政

太夫人下世公每撫及創痕輒流涕沾襟●二程入席。母叱絮羹。儒風淡泊。天性少成。

程子之父大中珣夫人侯氏每食必置二子於席末或絮羹則叱之曰幼求滿欲長當何如故

明道伊川兩先生以名儒通顯於飲食衣服無所擇少成若天性母教使然也 又陳堯咨守荊

州回母問其治行對曰承平無事惟習弓矢以備捕盜耳母怒曰幸備位郡守萬人託命不務德

教而欲以一夫之勇立威豈汝父之意耶撞之碎其金魚●陳祐之母。以髮易經。學成簪仕

。官至左丞。元史陳祐家貧母張氏剪髮易經以供祐讀祐學成筮仕官至行中書省左丞

●●第五曰慈仁●樊姬諫獵。不食野禽。王聞其語。感動於心。楚莊王好獵樊姬諫

不聽姬爲之不食鳥獸之肉王問之對曰鳥獸在山林各有戚屬何異妾之託於大王今乃張網彌山毒矢烈火使之母子分離雌雄失散妾是以不忍食其肉也王感其言乃止獵●叔敖埋蛇。母聞而欣。利人利物。災禍不侵。孫叔敖見兩頭蛇以爲不祥不欲人再見埋之以告其母母曰汝存心如此天必佑汝厥後叔敖爲楚相●漂母飯信。哀彼王孫。淮陰封侯。報以千金。韓信微時釣於橋下饑甚漂母憐而飯之信從漢高祖滅楚封淮陰侯報漂母以千金母曰吾哀王孫而進食豈望報乎辭不受●延年好殺。母聞而驚。天地好還。不爽毫分。宣帝時嚴延年爲河南太守每冬殺所屬縣囚血流數里人謂之屠伯其母從東海來至洛陽聞之大驚止於都亭不肯入府責延年曰幸備位郡守不聞仁義教化有以安全愚民而惟以刑殺立威天道神明不容人好殺我不憶老年見壯子被戮也行矣遂東歸未久有鳥似鳳凰黃霸奏賀得賞延年不服因有蝗乃諷曰此物豈鳳凰所食耶人告之鞠得誹謗數事遂棄市人莫不賢智其母●雋不疑者。斷案引經。仁恕平反。母命是遵。雋不疑斷案必本經術多所平反每歸母必問曰今日活人否有則母喜而加餐故不疑爲吏嚴而不酷人稱其仁恕●孟宗游學。母作大衾。觀摩集益。共被陽春。吳江夏孟宗嘗從南陽李壽游與同學共處孟母作十二幅大被鄰母問之對曰小兒無識量恐不顧同類作此令與貧家子共寢處庶聞君子之言耳●魏徵直諫。帝快於心。長孫皇后。調護諫臣。唐魏徵每犯顏直諍帝皆容

納之一日太激切帝快於心入宮曰他日必殺此田舍翁長孫皇后問爲誰帝曰魏徵每庭辱我后朝服而賀曰妾聞主明則臣直今魏徵直由於陛下之明也且隋臣諛佞主不聞其過以致亡國今陛下有直臣國不亡矣妾敢不賀帝悅待徵如初●宋皇太后。諡曰宣仁。革止新法。以救蒼生。宋宣仁太后高氏神宗之母也時王安石創行新法流毒蒼生及哲宗嗣位司馬溫公爲相太后從其請革止之民困以甦朝野大悅太后性仁明優禮大臣詢問閭閻疾苦以邊砦之地賜西夏不用兵革知哲宗孟后之賢而憫其福薄聽政九年不御正殿嘗曰母后當陽非國家美事不私外戚爲天下惜財人稱爲女中堯舜●左藏妻歿。娶妻之妹。撫卹幼兒。咸推慈惠。馮左藏娶開封張顯之女生二男二女而張氏卒臨終謂左藏曰吾妹性慈可撫幼兒左藏娶之視其姊所生男女無異所生人咸稱其慈惠●元世祖后。宏吉刺氏。惻惻宋俘。計及後世。元世祖滅宋俘宋幼主熲及其母全太后至燕京世祖后宏吉刺氏惻然不樂世祖曰今江南已平不復用兵何不樂也后曰自古無千歲之國吾不忍子孫之及此也全太后不習北方水土爲之請歸世祖不許后乃厚遇之宋寶貨輦至廷中衆爭取之后曰宋人積此以遺子孫子孫不能有以至於此何足貴也竟一無所取世祖欲以城外近地爲牧馬場后陽責劉秉忠曰汝何不諫若初建都時卽以牧馬則可今爲軍民分業忍奪之乎 宏吉刺清廷譯作翁吉喇特后諡順聖●明太祖時。宋濂被逮。馬后勸救。全活國士。明洪武時胡惟庸之

亂株累宋濂太祖怒欲殺之馬后諫曰民間請一先生尙始終敬禮宋先生教太子諸王不越禮法即有罪忍以刀鋸加其頸乎况宮廷深邃先生安知外事濂得免死后疾篤不服藥太祖強之后曰天數有定服之不效陛下必以念妾之故而加罪於用藥者竟不服而崩太祖痛之終不立后●成祖殘刻。慘殺忠良。徐后慈淑。諫於帷房。燕王棣稱靖難兵入南京篡位凡忠於建文者悉遭殺戮徐后太祖功臣徐達之女也性慈淑時有匡救嘗謂諸妃嬪曰夫婦之際言婉而易入外廷所不能言者房帷之內未始不可言也●林媪救飢。爲食道旁。牛眠叶吉。後裔繁昌。福建林媪值歲飢作湯丸鬻道旁貧餒者至則餽之有一書生常過食媪無吝色一日書生指一地曰此牛眠吉穴也惟有德者足以當之媪與公合葬焉林氏子孫繁衍科甲仕宦至今不衰●林姑利濟。德媪慈航。世崇天后。俎豆馨香。林姑福建莆田人自幼喜慈善茹素戒殺救難濟急以不字終閩人尊爲天后各處皆有祠宇凡在各省建立會館皆奉祀焉崇拜甚虔謂其神能救舟行之險也

●第六曰信義●許穆夫人。欲唁衛侯。義不可往。中道而休。衛宣公之女爲許穆公夫人衛爲狄所滅懿公被殺文公嗣位許夫人憫衛之亡欲往唁之行至於漕聞許之大夫有奔走而來告之以義者遂不敢往賦載而歸所謂發乎情止乎禮義者也●介之推母。利祿弗求。繇山隱逸。芳名永留。晉文公爲公子出亡十九年介之推與諸大夫從之文公反國

賞從亡者介子不言祿祿亦弗及其母率之隱於緜山文公求之弗得以緜上爲祭田曰以志吾過且旌善人或以爲火焚而死今寒食禁火蓋弔之也●晉女趙姬。貴而能遜。叔隗在狄。迎歸於晉。晉文公即位以女妻趙衰生原同屏括樓嬰先是趙衰從文公奔狄狄人納二女一名叔隗一名季隗文公娶季隗以叔隗與趙衰生子名盾母子俱處於狄至是趙姬勸衰迎盾與其母衰弗肯姬曰得寵而忘舊何以使人固請迎之至姬以盾爲才固請於公以爲嫡子而使其三子下之以叔隗爲內子而已下之●老萊躬耕。不求仕進。其妻投畀。堅辭楚聘。列女傳老萊子耕於蒙山之陽楚王駕至其門聘之其妻曰妾聞可食以酒肉者可加以鞭撻可授以官祿者可隨以斧鉞是受制於人也妾不願受制於人投畀而走 又韓詩外傳楚莊王使人贖黃金百斤聘北郭先生爲相先生之妻曰君以織屨爲食今若結駟連騎所安不過容膝食前方丈所甘不過一糲而殉楚國之憂可乎遂不應聘●班氏婕妤。安於義命。飛燕譖之。免於考問。漢成帝時班婕妤在後宮趙飛燕姊妹譖其祝詛主上婕妤曰死生有命富貴在天修正尙未獲福爲邪更將何望使鬼神有知不受不臣之愬如其無知愬之何益上善其言赦免考問●憲英許字。變起中途。患難相保。金石不渝。魏侍中辛毗之女名憲英許字羊耽羊氏中途遭難憲英之父兄欲改婚憲英曰旣與之約平時尙宜相保况患難時耶遂不改旣嫁生子琇仕於晉鍾會伐蜀以琇爲參軍憲英戒之曰軍旅之中惟忠義仁恕爲有濟會至蜀

反與鄧艾俱死於蜀惟琇遵母訓以道全身●承祖氣燄。戚黨共趨。惟母之妹。獨與之疏。齊書符成祖當權戚黨共趨赴之惟其母楊氏之妹爲姚氏婦獨與之疏姊與之衣妹弗受及成祖敗附之者多連坐惟母之妹不與焉●朱百年死。家無積儲。妻崇廉介。辭米百斛。南史朱百年卒家無存積故友蔡興宗爲會稽太守饋以米百斛其妻孔氏不受使婢辭之。又曹修古卒於官吏賻錢數十萬千女方及笄謂其母曰吾父以直言見譴而死豈可以此汙其清德固辭不受。又蔡君山卒縣人賻以錢二百千其妻程氏曰吾家以廉爲吏豈可以此汙吾夫之名行辭不受●梁公姨母。牽子隱居。不事女主。射獵自娛。唐武則天以女主稱制改國號曰周廢其二子而欲以其侄武三思梁公狄仁傑爲相忍垢事之於母子之間多所調停一日訪其姨母於城南午橋姨母之子獵歸見梁公一揖貌似疏野梁公欲引之仕姨母曰吾子不事女主梁公慚而退。又李白集范傳正爲宣歙觀察使訪李白子孫獲其孫女二人一爲陳雲妻一爲劉勸妻皆農家也衣服質樸儒風宛在自云父伯禽不祿有兄出遊不返欲耕織而無田桑嫁村農救死而已泣下數行傳正欲改適士族女曰旣托身於下里若仗威力改適他門何以見先大父於地下傳正贈以金帛辭曰幸能自給不受傳正免其徭役●花雲戰死。賴有孫姑。竊兒見帝。嬰杵同書。明太祖將花雲駐太平城與陳友諒相持衆寡不敵被執猶脫縛罵賊殺數人而死郤夫人投水以殉侍婢孫姑收葬畢負雲幼兒逃爲賊所俘孫姑寄

兒於漁母隨賊行夜復潛遁宿陶穴中備歷艱辛賊退乃詣漁母索兒漁母欲弗與孫姑泣兒牽孫姑衣亦泣漁母乃還之孫姑抱兒達行在帝悲喜交加謂兒風骨如雲年十五封萬戶侯李文正公東陽作歌以紀之 歌曰花將軍身高八尺勇絕倫從龍渡江江水渾提劍躍馬走平陸敵兵不能逼主將不敢噴殺人如蔴滿川谷徧體無一刀鎗痕太平城中三千人楚賊十萬勢欲吞將軍怒呼縛盡絕罵賊如狗狗不猜檣頭萬箭集如蝟將軍願死不願生作他人臣郤夫人赴水死有妻不辱將軍門將軍侍婢身姓孫收尸葬母負兒走爲賊俘虜隨風塵寄兒漁家囑漁姥死生已分歸蒼旻賊平身歸竊兒去夜宿陶穴如生墳亂兵爭舟不得渡墮水不死如有神浮槎爲舟蓮爲食空中老父能知津孫來抱兒達行在哭聲上徹天能聞帝呼花雲兒風骨如花雲手摩膝置泣復嘆兒汝不死如雲存兒年十五官萬戶九泉再拜君王恩忠臣烈婦古稀有嬰杵尙是男兒身英靈在世竟不朽下可爲河嶽上可爲星辰君不見金華文章石室史嗟我欲賦豈有筆力垂千鈞◎劉審之婦。操履素嚴。有饋金者。拘送朝端。語林洪武中劉審爲刑部主事其妻安氏晨起方梳有以瓜盛金饋之者蓋富人犯法欲賂之以追其罪也安氏呼僕拘送於朝◎廣孝之姊。伏處江南。貴僧謁拜。責其傷殘。姚廣孝又名僧道衍密啟燕王棣稱靖難兵入南京篡位改號永樂凡忠於建文者皆被殺戮方孝孺一人不屈戚黨坐死者六百餘人廣孝寵貴異常不蓄髮娶妻帝賜以二美人弗受其胞姊爲金陵民婦廣孝訪謁之姊不欲見

舉家敦勸乃出廣孝伏地拜姊曰我一民婦何足當貴人許多拜惟聞和尙慈悲乃殺若許人乎廣孝面赤姊拂衣入以後不復相見●胡廣有女。許字同官。女守初約。謝以赦還。永樂朝解縉與胡廣同爲學士成祖曰卿二人幼同學長同官何不更聯婚姻乎廣有女許字縉之子未嫁而縉遭讒死於獄妻子徙邊廣欲改婚女剪髮泣曰薄命之婚皇上命之吾父承之禍福由天豈可改易廣乃止未幾解氏赦還遂完娶焉●主事鄭曉。銓曹清班。妻郤金茗。德量淵涵。嘉靖時鄭曉爲吏部主事兼文選司有人以茗覆金饋之夫人撥茗知有金封還其茗●第七曰文學●柳下惠歿。妻爲之誄。和光同塵。其諡曰惠。魯大夫展禽食邑柳下既歿門人思所以誄之其妻曰惟我知夫子夫子之不伐兮夫子之不竭兮夫子之誠信而與人無害兮夫子處世和光同塵兮夫子之諡宜爲惠兮●伏女傳經。家學淵邃。晁錯得之。永存國粹。漢承秦後經書盡遭焚燬文帝時伏生名勝通尙書帝使晁錯往求之生年九十矣命其女代傳得廿九篇●大家班昭。孟堅之妹。續修漢書。史學不墜。班昭班彪之女曹壽之妻也其兄班固字孟堅著漢書未就而卒和帝命昭就東觀續成之其八卷天文志皆成於昭又有女戒女箴賦頌銘誄行於世號曰大家其子穀爲陳留長迎大家至任子婦丁氏作大家讚 又崔駰之曾祖母師氏通孝經百家之言王莽賜號曰義成夫人●蔡邕遺書。名山珍貴。其女文姬。傳之曹魏。蔡邕字伯喈董卓聞其名以威脅之使爲中郎及王允誅卓

並殺邕。邕女名琰，字文姬，幼聰慧，博學能文。爲董祀婦，文姬陷於胡，曹操贖歸。董祀有罪，文姬爲之請詞，極婉切，操釋之。操與邕善，訪求遺書，文姬曰：「亡父書八百卷，今能記憶者四百篇而已。」操給筆札，錄之，毫無遺誤。●甄后嗜學。披覽時勤。監於前代，得失之林。甄后幼嗜學，嘗披閱諸兄書籍，兄曰：「汝女子，欲詞科對策乎？」女曰：「自古賢女皆知前代得失，不觀書何以知之？」後爲袁紹子袁熙婦，曹操滅袁氏，其子不納之，丕篡位，立爲后。●衛夫人書。世所共稱。前有鍾繇。後則右軍。晉衛夫人名櫟，字茂漪，汝陰太守李渠之妻也。得鍾繇筆法，王右軍嘗師之。杜子美詩云：「學書初學衛夫人，但恨無過王右軍。」●道韞詠雪。敏慧絕倫。柳絮一語。四座皆驚。謝太傅安諸子，侄皆甲秀，值冬天大雪，命諸子賦詩，其一曰：「散鹽空中差可擬，安侄女道韞奕之，女也。」應聲曰：「不若柳絮因風起。」安大奇之。道韞嫁王右軍之子凝之。●王肅之女。頗識書文。祖見而喜。卜家必興。王肅女於文義過目即識，其祖司徒導異之，曰：「興吾家者必此女也。」後爲明帝后。伽藍記：王肅在江南聘謝氏女爲妻，及至京師，復尙公主謝氏爲尼來訪，肅贈以詩云：「本爲箔上蠶，今爲機上絲，得絡逐勝去，頗憶纏綿時。」肅感動，公主代答云：「針是貫絲物，目中常絳絲，得帛縫新去，何能似故時？」謝氏去，肅恨甚，遂造正覺寺，憇焉。明帝后是謝氏所出，否不可考。又鮑昭字令暉，答武帝曰：「臣之才不及太沖，臣之妹不減左芬。」●惠妃徐氏。幼有文名。太宗聞之，召爲才人。唐徐惠妃，徐孝德之女也。五月能言，八歲通論語，孝德命擬。

離騷遂爲小山篇太宗聞之召爲才人及太宗伐高麗惠妃上書極諫●奸相元載。家道素貧。妻勸之學。勉以忠貞。元載妻王忠嗣女也名蘊秀載家貧女勸之學同遊京師伴之讀及載爲相黷貨弄權妻作詩以諫不聽載死查抄其家胡椒八百斤寶貨不可勝計代宗命王氏入宮備彤管箴規之事王氏曰王家十三娘子父爲節度二十年夫爲宰相十六年誰書得長信昭陽之事卽得罪亦幸矣堅辭不受●公垂少孤。年方六歲。母授以經。官至相位。李紳字公垂六歲而孤母盧氏經學湛深遂以教授其子紳爲首相有名望焉●關圖女弟。文章炳蔚。進士才名。高出儕輩。南楚新聞關圖有妹博通典籍文思敏捷圖長曰吾家有一進士恨不櫛耳後適常修 又崔寔母博覽書傳達於政治寔守五原多善政母之力也 又白香山得紫蘭石欲刻友人詩文其女方十歲書北山移文甚工遂刻焉 又遼邢抱樸少孤母陳氏教以經學抱樸與弟抱質皆以經學顯●耶律楚材。元朝名宿。三歲而孤。慈幃教授。元耶律楚材遼宗室也三歲失父其母楊氏學識宏通親教楚材仕元爲顯宦於歷象天文之學無不通焉 又虞集之母口授集左傳及歐蘇各大家之文集遂成碩儒●叔仁之妻。折封南牖。寄夫以詩。詞旨溫厚。吳叔仁游太學寄妻韓氏以簡妻拆視之無字乃復叔仁以詩曰碧紗牕下拆函封一紙從頭澈底空料是仙郎無別意憶人全在不言中叔仁復答以詩●沈女瓊蓮。識居人右。題試守宮。斥秦之陋。明孝宗時沈瓊蓮字瑩中爲女給事孝宗試以

守宮論瓊蓮起筆云甚矣秦之陋也宮何爲而用守哉孝宗大悅擢爲第一宮中謂爲女學士鄉人謂之女閣老●楊太夫人。孫公繼室。一家機杼。文章是織。孫文恪公名陞繼配夫人楊氏工部員外郎楊應獬之女也詩麗而則教子孫如嚴師子爲卿貳者四人夫人所生者二人諸孫皆進士大學士如游其孫也●命婦蔡琬。博通典籍。達於政治。贊襄文檄。清康熙時高文良公夫人蔡氏名琬字季玉將軍毓榮之女尙書挺之妹也其母有國色相傳爲吳宮人夫人生而敏慧文良公爲江蘇巡撫總督屢傾之幸聖祖知公清介得全公詠白燕詩有句云有色何曾相假借沈思對句夫人代對云不羣仍恐太分明蓋規之也夫人博極羣書達於政治公奏疏文檄每與之商定其父將軍平吳逆晚年獲咎隱於九華峰寺夫人有詩云赤手屠鯨千載事白頭歸佛一生心征南部曲今何在剩有枯禪守故林●高氏景芳。吟壇樹幟。有子象賢。侯封永襲。張靖逆侯夫人高氏字景芳幼聰慧能詩年十五詠晨粧云粧閣開清曉晨光上畫欄未曾梳寶髻不敢問親安妥帖加釵鳳低徊插佩蘭隔簾呼侍婢背後與重看子名謙幼篤孝夫人喜有句云高捧名花求插髻徧擇佳果勸嘗新侯好客喜施不二十年百萬費盡而薨夫人積存三十萬子乃得襲封●李女能詩。兼有卓識。諷刺弓鞋。足箴陋習。杭州趙鈞台赴蘇買妾有李女貌佳而足欠纏趙曰如此丰姿可惜土重言其足不合意也媒媪譽其能詩請面試之趙以弓鞋爲題女即書云三寸弓鞋古所無觀音大士亦雙趺不知纏足從何

始始自人間賤丈夫趙慚而退

●第八曰武略●牧野誓師。九人在外。內有邑姜。永清四海。周武王伐紂誓師於牧野曰予有亂臣十人孔子曰有婦人焉婦人蓋邑姜也邑姜太公之女武王之后太公爲兵法之祖邑姜必有家傳密贊武王於內非必身在行間也●馮夫人者。錦車出塞。說彼烏孫。使之向內。漢馮夫人名繚爲右大將妻侍烏孫公主說其王烏就屠使之向漢●孫翊之妻。洵有智慧。報夫之仇。斬賊於晦。嬌覽殺孫翊入軍府取其諸妾見翊妻徐氏色美復欲取之徐氏請俟晦日除服及晦先召翊舊將孫高傳嬰伏於房乃熏沐邀覽入伏起殺之以其首祭翊●幼習兵法。孫權之妹。侍婢擗甲。凜然可畏。吳孫權之妹幼習兵法有諸兄風嫁漢昭烈帝合番之夕侍婢執兵環立昭烈帝命去之夫人笑曰丈夫撕殺半生尙畏見耶帝曰吉禮不用凶器乃撤之●澄守揚州。賊鋒甚銳。母氏登城。賊敗而退。魏任城王澄守揚州賊帥姜慶眞攻之城幾破澄母孟氏率兵登城激勵將士賊力窮而退●趙娥登車。藏劍於袂。報父之仇。詣縣請罪。魏志趙娥之父爲李壽所殺娥帷車袖劍白日刺壽於都亭乃詣縣請罪縣令釋之●李毅之女。其名曰秀。攝領寧州。掩擊夷寇。晉惠帝十六年雲南五苓夷寇寧州會歲饑刺史李毅卒其女秀明達有父風衆推領州事城中糧盡掘鼠拔草而食秀獎勵戰士乘賊怠而掩擊之賊敗走後毅子釗自洛往衆推爲主釗請朝廷命人代之

乃以王遜爲南夷校尉兼刺寧州●朱序守邊。苻堅躡後。母築斜城。頽垣能守。孝武帝三年朱序守梁州母韓氏知秦苻堅兵將至履行其城見西北隅不固率婢百餘人及城中婦女築斜城於內秦兵至西北果潰賴有斜城得以保全人謂之夫人城●邵女驍勇。有父之風。救夫出險。抗石季龍。晉書邵續女驍勇有父風其夫劉遐爲石季龍所圍邵氏率數十騎拔遐於萬人之中又田防爲亂劉遐應之邵氏力勸不聽乃焚其甲械一夕而盡●杜曾稱亂。圍困苟崧。有女救父。衝破賊鋒。苟崧爲杜曾所圍時覽爲平南將軍發救兵未至而勢甚急崧女名灌年方十三率數十勇士踰城突圍且戰且前救至賊走●木蘭氣壯。代父從戎。征袍被體。兒女英雄。木蘭之父曾爲軍校年老家居有子尙幼惟木蘭長未嫁時軍事徵調蘭父蘭着征袍扮作男子跨馬代父行立功而歸在軍中十二年人莫知其爲女子也木蘭睢陽人或云晉時玩本詞當在唐初借兵突厥時●平陽公主。助唐太宗。自營戎壘。娘子軍容。唐太宗勸高祖起兵太宗妹適柴紹家資殷富盡毀之募兵助唐得精壯數千所至克捷太宗爲秦王與之會於渭水紹夫婦各立幕府軍容整肅人謂之娘子軍後封平陽公主又史思明之亂衛州侯氏滑州唐氏青州王氏歃血討賊許叔冀奏補果毅又崔甯代杜鴻漸爲成都節度使甯因事赴京其弟寬代守楊子琳以兵入據之甯妾任氏散財十萬得勇士數千手揮之逼走子琳又楊大眼妻潘氏每出獵與大眼齊驅並轡又李蕩李雄爲羅尙所攻

其母羅氏擐甲拒戰以救之。●桂娘智術。妙用不窮。授意仙奇。剪除元凶。李希烈反掠汴梁寶良女桂娘乃顧父私言曰我能殺賊父詢安之桂娘知陳仙奇忠勇其妻亦寶氏因勸希烈任之遂得往來相接未久希烈病桂娘致意仙奇賂醫毒殺之希烈之子欲盡殺諸將而自立仙奇未之知也桂娘染帛棗絮如桃形置書其中以餽仙奇仙奇得書乃殺希烈之子及其黨詔拜仙奇淮西節度使●奚氏拒賊。督率家僮。詔封誠節。天語酬庸。鄒保英爲平縣令寇至城孤援寡將棄城走妻奚氏督率家僮及城中男婦拒守賊退詔封誠節夫人●李侃爲令。流賊環攻。楊氏督守。建立奇功。李侃爲項城令李希烈之黨攻城急侃中微傷入署欲遁避妻楊氏曰今若退則土地人民倉儲器械皆爲賊有死於法何如死於敵乃與侃俱出登城督守賊退去侃得遷秩●賊掠王女。入於山中。女斬叛將。義勇可風。薛仁杲部將旁仙地已降復叛掠王氏女入於山中女有姿啖賊以甘言賊信之醉飲酣眠女取其佩刀斬之乘賊馬送首於梁州詔封崇義夫人●南宋名將。惟韓世忠。夫人桴鼓。蕪王受封。宋高宗時金人入寇韓世忠督戰夫人張氏親援桴鼓屢敗金人世忠封蕪王與岳武穆齊名●石砮女官。有秦良玉。起義勤王。流賊畏服。明秦良玉四川忠州人嫁石砮土官宣撫使馬千乘夫死代領其衆天啓元年永寧土司奢崇明反播州諸蠻應之衆至數萬殺官奪城良玉統精兵馳援克新都及二郎關崇禎十三年敗羅汝才於夔州嘗語其衆曰吾兄弟三人皆死

王事吾一婦人受國恩二十年恨不能滅賊汝等敢有從賊者族無赦流賊招諸土司不敢至石碯崇禎帝賜詩有句云桃花馬上請長纓又云試看他年麟閣上丹青先畫美人圖封忠順夫人

●張銓在遼。守義不屈。夫人霍氏。守城不辱。張銓爲遼東巡按御史天啓元年爲清兵所執不屈清人義之令還署遂自經清人以禮葬之其家在沁水之寶莊城崇禎五年流賊至二子道濬道澤皆官京師夫人在城衆懼欲走夫人曰出則家不保出而遇賊則身亦不保乃率僮僕及城中人共守殺賊甚衆賊懼不敢復至冀北道王肇生表其城曰夫人城

●第九曰識鑑●楚子伐羅。夫人致戒。莫敖心驕。知其必敗。楚武王使莫敖伐羅夫人鄧曼曰莫敖狃於蒲騷之役必小羅而不設備莫敖敗縊於荒谷●衛姬在齊。爲衛請罪。桓公悅之。兵不加衛。齊桓公與管仲定議伐衛退朝衛姬曰敢請衛君之罪公曰誰告汝也姬曰今君有怒容知將伐人國也見妾而色動故知伐衛也公悅次日管仲朝公旁視而言管仲曰君將赦衛乎公曰仲父在外衛姬在內寡人可以無憂也●僖負羈妻。識晉公子。置璧饋餐。待之有禮。晉文公爲公子時出亡過曹曹共公聞其駢脅觀其裸浴僖負羈之妻曰晉公子之從者皆足以相國必反其國而得志於諸侯乃饋餐置璧公子受餐反璧及文公卽位伐曹免僖負羈之室●漢帝微行。入於逆旅。主人之妻。心知其異。漢武帝微行入於柏谷逆旅主人疑爲姦盜聚少年欲攻之主人之婦曰客狀貌非常且有備乃飲主人及少年

以酒而力止之於是殺雞以饗客帝歸以河津賜之令爲寶門亭長鬻渡故至今名爲寶津●李衡之妻。料事有識。請罪詣囚。前愆盡釋。吳丹陽尹李衡數以事侵鄧瑯王休其妻習氏諫之不聽王即位衡懼欲奔魏妻曰不可王好善而慕名必不以私憾見害可詣囚列表前失必反見優饒衡從之吳主詔曰前丹陽尹李衡自以前愆詣囚可仍還郡●山濤嵇阮。名望相埒。才絀量優。妻有鑑別。晉山濤與嵇康阮籍相善嵇阮至濤家其妻覘之謂濤曰君才不如彼當以度量勝之耳濤笑曰彼亦以我度量爲優●司馬桓溫。爲石崇客。侍婢覘之。知其爲賊。石崇豪侈廁所置侍婢桓溫至如廁旁若無人溫出婢相語曰此客將來必能作賊厥後溫廢帝奕而立昱爲簡文帝並謀居攝●劉裕英雄。起於草澤。桓元之妻。知爲人傑。宋武帝劉裕起於草澤從刺史桓修入朝桓修之子桓元反僭號永始謂裕風骨異人欲倚任之其妻劉氏曰裕龍行虎步終不爲人下不如除之元不聽後裕自京口起兵討元及元敗被誅裕得權遂篡晉 又何無忌之妻知劉裕舉事必成見無忌與其舅劉牢之爲裕草檄甚喜 又吳隱之居貧韓康伯之母見之知其爲名士●王珪之母。識杜與房。彈冠相慶。相業輝煌。王珪之母謂王珪曰吾兒必貴但不知所交者何人可邀與俱來房玄齡杜如晦至其家母見之喜曰是皆公輔器也吾兒與之遊貴無疑矣房杜旣相王珪位至三公同心輔政皆有盛名●俊臣用事。氣餒方張。侯敏有婦。得免禍殃。則天朝來俊臣用事刑戮慘刻侯

敏諂附之得爲上林令其妻董氏曰彼國賊豈能久附之必得禍敏疏之俊臣怒出敏爲武龍令敏不欲往妻促之行俊臣敗其黨皆坐惟敏得免●劉晏之女。生潘孟陽。綠衣末位。識杜黃裳。潘孟陽之母劉晏之女也杜黃裳爲補闕時嘗與諸客至孟陽家客去孟陽之母曰綠衣末座者誰也孟陽曰補闕杜黃裳也母曰此人全別後必大貴黃裳果至相位孟陽爲侍郎母懼其弗勝孟陽果敗●延實之女。擇配韋王。夫人藻鑑。超越尋常。張延賞爲西川節度使有女擇婿夫人苗氏以韋皋爲婿皋放蕩延賞惡之僕婢因之侮慢苗氏曰彼窮措大非庸劣也仍優待之皋東歸妻傾篋以助及皋爲節度往代延賞改名韓翃戒左右勿洩行至大回驛塘報至苗氏曰必韋皋也延賞曰彼韋生填溝壑久矣皋抵成都延賞慚而遁皋杖殺僕婢之無禮者事苗氏過於布衣之時皋封西平王 又中丞南卓微時遊上蔡城南鬻飯老嫗待之有加禮後十年卓爲上蔡牧嫗已故卓奠其墓而撫其家 又劉道真嘗漁於草澤有老嫗奇之饋以豚食之弗謝後復進一豚及道真爲吏部郎嫗之子爲小吏道真擢用之

●第十曰職業●黃帝元妃。蠶事教民。衣被後世。流澤至今。 上古衣鳥獸之皮至黃帝元妃始教民飼蠶繅絲織錦於是國家有黼黻文章以別貴賤庶民被體禦寒養生送死萬世利賴焉●周之太姒。貴而能勤。爲締爲綌。葛布始興。 周文王后妃姒氏生有聖德詩云葛之覃兮施於中谷維葉莫莫是刈是穫爲綌爲綌服之無斃言后妃貴而能勤采葛織布

以爲夏季之服也。●齊有仲子。處於於陵。其妻緝縷。以佐養殮。戰國時齊陳仲子隱居於陵。織履灌園以爲生活。其妻緝縷以佐之。●陸續之母。禮法是循。斷葱切肉。雖細必矜。漢陸續在獄。母視之不得見。饋以食。續得食泣。吏卒怪而問之。續曰。母切肉必方。斷葱以寸爲度。今至不得見。是以泣也。吏爲之白。遂得原釋。●魏有巧婦。曰薛靈芸。縫紉敏速。號曰針神。魏明帝宮中有四美人。其一曰薛靈芸。手工敏捷。雖暗室黑夜。能剪裁縫紉。人稱爲針神。又名薛夜來。明帝衣非其所製。不服。●蘇蕙織錦。遠寄良人。回文旋轉。精妙絕倫。晉竇滔妻蘇蕙。字若蘭。常捶辱舞妓。滔爲安南節度鎮襄陽。携愛妾行。蕙織回文錦爲詩。以寄之。橫豎斜曲皆成文理。滔使人迎至鎮。●李氏絡秀。率婢調烹。嘉賓式燕。不聞人聲。李絡秀年十七歲。將軍周浚出獵。避雨其家。適絡秀之父母及兄俱出外。乃率羣婢宰猪羊。設饌。酒餚精潔。不聞人聲。浚使人覘之。見一女甚美。浚歸求爲妾。父兄欲勿許。絡秀曰。門戶殄瘁至此。何愛一女。乃許之。生顓嵩。謨兄弟三人皆貴。●陶令隱居。號稱五柳。夫耕於前。妻饁於後。陶潛字淵明。爲彭澤令。有督郵至。吏請往謁。淵明曰。吾安能爲五斗米折腰。在官六十日。遂辭而隱。耕於隴畝。間妻翟氏與之同趣。自行炊饁。不用僕婢。淵明門前植五柳。號五柳先生。●劉元佐母。德性敦厚。織紉一端。本業是守。唐劉元佐爲河南都統。制其母每日織紉一端。示不忘教。元佐盡臣節。見縣令走庭中。白事。戒元佐曰。汝父爲縣吏。趨走亦當如是。今汝據

案見之於心安乎故元佐待下有嘉禮●齊亮謀叛。母弗與居。自耕而食。自織而衣。安南賊帥齊亮之母教亮以忠義亮弗聽母遂與之絕自田而食自織而衣大歷中年已老而積儲足以自贍代宗褒之賜以兩丁奉養●箋名薛濤。一紙之微。信函適用。名以永垂。

薛濤字洪度父陝西人姓鄭官蜀遂留寓焉濤八九歲知音律能詩章舉爲節度使召之佐酒得厚資歸與其母隱於浣花溪舉之後未嘗見客有名人相訪惟以所造五色花箋題詩贈答著有詩五百首節度使段文昌爲之撰墓誌花箋便於信函後人仿造名薛濤箋亦美術之一端也●行逢在鎮。果於殺戮。妻適村郊。耕田納粟。後周周行逢爲武平節度使果於殺戮妻鄧氏屢諫行逢怒叱之妻乃卜居於村墅耕稼營生嘗親率僕婢納稅行逢曰夫人何自苦乃爾妻曰稅官物也我不先民安能急獨不記爲里正時代民完賦免其鞭撻乎行逢感焉自是用刑稍減●趙氏子昂。書畫傑出。夫人管氏。善畫松竹。宋趙孟頫字子昂工書畫善畫千里馬夫人管氏善畫松竹均爲世所寶●雷膺之母。織紵鞠育。子登科第。提刑典獄。元雷膺字雁正七歲而孤母侯氏織紵爲業課以書膺登第爲浙江提刑典獄●家民素貧。妻勸之讀。紡織以供。共食天祿。明朱家民字同人雲南曲靖人家貧廢學妻黨輕之妻脫簪珥勸之讀紡織以供家民成進士崇禎二年貴州水溪蠻與邦彥與奢崇明等反家民爲副使與總督朱燮元討平之築城置戍於盤江修鐵索橋於南籠府有政聲

中華民國二十八年己卯八月出版

歡 迎 翻 印

女 教 箴 規

每册定價國幣壹角

北京救世新教總會發行

安定門內淨土寺六號
電話東局六〇五五號

慧 濟 江 朝 宗 敬 梓

北京順城印書局印刷

和平門內順城街四九號
電話南局四一二〇號

2

311143

h

2

311143

(1)